

寓

蜀

草

客居潭北之莊詩續劔南之學志抗
乎碧雞使者才陵乎白鳳詞人翻巴
渝之曲譜巫峽雲飛振蜀國之弦聲
我眉月出西園紀詠東閣招吟載鶴
而來聽鵲有感此爪跡留於一時而
有寄乎千載也我
雪嶠夫子

才東國捧檄西川姓傳叱馭之忠
臣人是飛鳧之仙令蠶叢一綫蹋皓
月以飛行鳥棧千盤度青天而直上
險鑿五丁之峽筆壘生開奇探二酉
之山詞峯秀起方其需次多暇呼風
月為傳舍對榻吟春與雲山作主人

挑鐙話兩尋芳遊揚子之亭訪舊醉
卽筒之酒縱目於三清閣裏梅市春
深遨頭於萬里橋邊草堂日落來看
八陣之圖穩作三刀之夢固不徒蘇
紅刻翠出敲金戛玉之聲儷白妃青
縫月裁雲之手矣迺者治洽筠山

流旭水將心作鏡式行如銅凜楊
震之四知致中牟之三異賢不必聽
鼓知智不必鞭絲見而得兩皆甘非
霜自肅能為劇縣猶是醇儒故其服
古入官仕優則學或張鐙召客或對
酒當歌時而老鶴孤鳴時而春鶯巧

轉時而風雨為之懷時而江山為之
感高章迴句汪洋濯錦之波麗典新
聲清潤浣花之水百鍊剛方之氣紙
上生稜一腔忠孝之心行間溢瀋雜
設蠹簡方愁丁甲能搜載入雞林亦
蛟龍欲攫豈僅陵顏輟謝傍李吞

也哉今夫玉壘千秋目極浮雲之
變詞源三峽氣涵江水之潮非文馳
天口詩雜仙心何以僕隸風騷策鞭
揚馬 夫子輕萬戶之侯封凌雲
載酒宰百里之花縣彈月鳴琴聞雲
有伴呼放翁橫笛倚樓北雨沾人繼

公武摩崖刻石裁成後學提唱宗風
洵藝苑之金科詩濤之寶筏也子來
身愧傳衣也傍催詩之鉢情殷接襪
許停問字之車坐風於凝翠樓中立
雪在鏡香亭畔讀等身之著作式多
之楷模山濤天骨無情吏隱之間

行風神自出塵埃之表胸中雲夢
吐露槎枒灰裏陰何撥除拉雜久稔
青箱舊學傳魯國之靈光爭看黃絹
新詞貯文翁之石室

受業徐子來謹序

寓蜀草自序

年少習舉業五十餘猶埋頭墨
卷中不知所為詩也觀古今詩集
茫然不辨美惡見者以詩自鳴遽以
災亦沈者隨年棄置去初傳和後
世寧知當世已無人過問年竊肉

人必讀系卷行萬里交天下文人奇
士以工下至議論又尤生具詩才或
磊落雄偉者不可無之概或清逸
雅淡迥絕恒流矣而後觸境感時
其氣盛其德深襟懷勃發淋漓而
後逸也豈苟而已乎此是也幼

年拈句白予無面況荒陋如余未
往問途而沾一言詩且以贈板亦笑
其愚不之甚乎友人苦不自知乃明知
所以故為告聖云詩言志賢士大夫
以其詩陳廟堂為雅頌而役辛勞
人思婦孺子未嘗不矢口歌吟彼

豈計工拙爭勝於人乎千載後獨
傳之不替作者繼起之無專隸亦當
去觴量抒情不能自己之不自料其
存否如浮雲之泛太虛而氣之隨
流水而已嗟乎古人不自矜其詩而
詩傳後人好自矜其詩而詩多不

傳古人不願以詩人自命不得已者詩
而詩傳後人或日以詩爲事詩之
書可傳此其故可識矣余平生境
遇坎壈牢騷抑鬱之氣人每借詩
爲之乃役於時文不暇作及乎年
衰志頹矣微逐風塵耗其日月鞅

掌簿書疲乏精神復鮮佳境好
題目之聊以粘毫者半游戲如嚙語
了不知何為漢魏唐宋胸中多倚
筆下安得為詩顧人不能可性情天
地不能盡夕月風雲山川草木人事
不能盡平波以失皆与性情相感發

者也至於與會處連則隨人所
得之淺深矣余詩不足論要無所可
言志迺者蓮溪先生守嘉郡屢
索觀愧無以告命人於經籍中摘抄畧
為審定遂付梓又徒請益於大雅
蓋欲歸里携亦爾好而省筆墨之

勞飽蠹里霞山面韻名流所不免
區、敬帝又何足云

道光丁未春般陽雪嶺王培荀上
於劍南崇署云漱翠樓

寓蜀草卷一

五言古

濟南王培荀雪嶠

古詩

灼灼桃李花芬芳殊堪悅顏色取媚人路旁苦攀折幽
壑秀孤松凌寒冒霜雪托根同大造似未知炎熱樵夫
火睥睨誰復憐勁節倉卒利生民爲薪詎不屑烈烈多
悲風歲久老幹裂寂寞空山中流泉聲嗚咽
黑海苦沈淪茫茫未有岸可憐一寸心擾擾置冰炭
穀等亡羊智巧空多算金石且消鑠朝權豈足玩置身
荆棘叢安能脫羈絆逐隊共浮沈夢夢誰爲喚

驅車上北原四顧天蒼茫山河勢阻絕風雪亦悽愴人
生各有適所悲在異鄉祿養未能遂怙恃嗟摧傷碌碌
徒奔馳所懷詎能償哀鴻鳴大澤饑雀噪空倉踽踽無
與偕中夜起傍徨慚愧田舍兒老稚聚一堂

中庭有高樹凌雲勢嵯峨古根穴螻蟻柔條綴女蘿委
曲依樹身糾結徧枝柯炎蒸庇已久霜雪掩覆多根枯
津液竭風條日蕩磨凌雲一失勢攀援又附他初時綢
繆意連理豈能過君子見未然獨立自婆娑

幽蘭在空谷蕪沒隨百草鸞鳳困樊籠仰視羨羣鳥既
登崑崙巔迴顧泰山小榮悴計目前方寸徒紛擾

遠方有佳客

遠方有佳客貽我尺素書中言金丹訣高步凌清虛招
我入山去無爲塵世居碧桃自開落白雲空卷舒沾沾
戀污濁衰頽將焉如我欲從之遊迢遞萬里餘袖書且
酣睡一夢到華胥

送鄒嘯山回江南

英雄失意時逐逐似爲利東西南北馳茫茫似無地問
子何爲來今復何爲去貧賤離家難他鄉分手易相見
知幾時相交本造次有懷難具陳相與謀一醉手無碧
琅玕贈子以涕淚我輩輕千金竟爲一飯累朔風客衣

單雨雪更狂肆黃鵠不敢飛蒼鷹亦垂翅遠道怯行邁
幸覆姜肱被

時與乃兄
和芬偕行

江南梅花開含香待君至

贈朱建屏

世人務廣交言甘色亦媚中道變故多相交悔太易余
生素寡羣疎野俗所忌三載住蒲陽感君不我棄稜稜
見君骨皎皎慕君義卓然立孤松古幹含冷翠昕夕時
往還切劘真利器吁嗟世途艱一往苦顛躓投足誤荆
榛夢魂猶驚悸諒哉君子節表裏終無二經旬嘆疎闊
丰采縈夢寐矧復歌驪駒萍梗何時萃促促困風塵鵬
息方垂翅病妻各在房出門交爲累人生天地間何方

得適意誰能略驪黃泥塗別騏驎願得素心人破俗尙
高致金石有變遷此衷幸不異

秦臺懷古

秦皇并六合至今無片土獨畱此高臺蒼茫孰爲主當
年萬乘來意氣雄如虎強暴且學仙願與安期伍列侯
與倫侯林綰斯共輔扈從翼祖龍橫視無千古鼉鼉駕
橋梁蓬萊終無睹烟雲幾變滅海濤怒吞吐何不予神
丹疏瀹彼靈府翻然悔前非治化慕鄒魯怪哉鎬池君
投壁遽還汝遺址徒嵯峨綠蘚滋秋雨迴望魯連臺一
杯沒沙浦布衣振高風乃令人起舞

古詩

地上多風塵天上多浮雲元黃忽易色清濁誰與論人
生日以多焉能辭苦辛辛苦不復辭肝膽孰相親黃鵠
舉千里志絕啁啾羣網羅蔽四海鍛羽徒逡巡聖賢嘆
一飽愚賤何足云

崑崙壓白日朔風起四隅隆冬苦晝短焚膏一何愚營
營百年內倏若過隙駒所謀苦不遂秋霜已盈鬚何不
慕豪俠擊鼓復吹竽何不隨化人振袂凌天衢千載草
元客抱志徒區區

中年哀樂多不自知其由匆匆朝復暮端坐集百憂一

身不自理誰爲子孫謀造物每愚人驅我若馬牛詩書
豈不貴糟粕共冥搜棄之若芻狗靜坐聽鳴鳩

中夜睡忽醒神氣多清明四十年間事都似隔前生我
今復爲人自喜心猶童旭日出林表天地闊洪濛倏忽
人事集雜沓日又終蜉蝣旦暮間竟與一世同

以上在蒲臺作

書所見

忍寒坐茅廬緼袍慚敝陋門外聞喧喚男婦環左右云
是離鄉人懸鵲面黃瘦是時天色昏雨雪沾衣袖柴車
堆敗絮呱呱啼孩幼老者前致詞投宿乞馬廐愧無廣
厦閒客館未能授揮手向前村奔趨眾恐後入室自忖

量所享吾已厚圍爐對燈花婦子且相守

宿石壕村

八蜀

夜宿石壕村忽思少陵語老婦及寡妻捉去見官府世
亂貧不安苛政猛於虎何幸生太平父老庇茅宇枹鼓
寂不鳴行間無待補客至主欣然黃梁旋已煮高眠雞
犬靜蕭蕭聽微雨豈獨風俗醇盛治久還古恬嬉忘帝
力唐虞應如許

出閬鄉城遙望有懷呂曉洲

同邑人

大河從西來風沙莽寥闊羣山相約束雄勢未得拓及
茲翠阜斷遙望西南豁急雨過崢嶸雲開漏日腳野水

沒車轍僕夫告饑渴長征馬已疲尙未登劒閣有懷賢
令尹回首瞻城郭德政載口碑英姿緬磊落願言步後
塵操刀試一割

五丁峽

朝入五丁峽日光如欲暮蒼崖兩壁夾青天一線露斧
鑿疑鬼工恢奇令人怖藥叉面青紅獅象類雕塑巨靈
立當關輿馬出其跨懸者如欲墜豎者如欲仆幽竇吹
陰風似有神靈怒錯愕不可名我初謂途誤虬穴狼牙
中行人艱移步徐玩意頗愜漸漸忘憂懼返愁境易窮
傍徨欲延駐康樂好遊山此境恐難遇

龍門閣

兩山忽然合鐵立塞乾坤水壅前無路幽窅開洞門轟
轟四山動直入雷怒奔人驚厚地陷呼吸相吐吞疑有
蛟龍蟄深黑入山根造物祕靈怪孰能測其源是誰施
神力斧鑿尙畱痕漸登龍洞背高閣巍然存欲尋杜陵
詩苔歿斷碣昏

漫興

拜謁力已疲旅寓聊駐足結習忘未能案陳書一束今
人日覲面神志渺不屬古人隔千載可與話衷曲藹然
見性情夜行遇明燭上下千百年曠然破跼促悲憤亦

間作咳唾盡珠玉江河激浪鳴噴薄有感觸雖未擴聰
明頗覺滌塵俗迴顧世網牽有如法吏酷賴此蠹簡在
欣然忘榮辱

偶作

大雅振衰靡浮豔秋風掃丰姿天賦殊貌亦非枯槁素
質未傾城摹擬笑鄰媼放誕矜風流齟齬未窮寵仙人
絕烟火冰肌愈娟好腸胃雜腥羶徒勞修外表所務根
柢深天葩非華藻春至萬卉蘇剪刻何能了僞唐形士
木仿宋體輕佻肆意緬前規翻新或太狡學詩乃無詩
噉名志則小風林響天籟洶湧兼縹緲吾師可往尋移

情在海島

旅館

城市負春色耳目未得清去年長安道塵土浣冠纓今
歲錦城住屈指屈清明清明渾忘卻但看樹芽萌桑葉
放嫩黃荆樹綴紫英高高棠棣花落蕊紛縱橫主人正
危坐好鳥時來鳴旅館雖逼仄相對足怡情憶昨遊北
郭青青麥隴平達官屢迎送馬前拜干旌郊原得縱目
且作踏青行大化自蕭閒眾人何紛營所恃心君泰俯
仰遂吾生

懷楊縝亭

盤錯理有餘，匏繫置散地。寂寞山城中，彈琴了無事。
相思隔重雲，無翼安能至。何以慰離情，雙鯉銜錦字。
閑句得一書，絮語如把臂。生平寡交遊，冷面人共避。
端居念昔賢，開卷輒心醉。異鄉喜逢君，鍼芥聯同類。
詩卷忽傳觀，杯酒共嘲戲。我居席未煖，君行已攬轡。
別時秋風涼，萬木忽彫悴。今春百卉蘇，蒙茸看集翠。
孤立誰與歡，羞入少年隊。嚙嚙拙言詞，慙直鮮嫵媚。
獨唱無與和，筆墨久荒廢。念君坐衙齋，山色如眉黛。
羅列門尹邢，綽約有餘態。臥遊雖寂寞，勝與俗人對。
超然得遠覽，豈屑遊物內。鵬飛萬里遙，九州如大塊。
瑣屑何足云，豪興推吾輩。

述懷

署鄴都時

早歲事詩書饑寒未遑恤
翹首望青雲則足屢見黜
裘馬諸少年飛騰矜彩筆
邱壑獨潛身茅廬風蕭瑟
拾橡悲少陵無錢類趙壹
中夜每起舞高歌聲中律
睥睨統袴兒一笑窮途失

少壯不再得流光駒過影
骨肉共欣戚追憶多佳境
坎壈遇彌艱紛營念自屏
閱世寡坦途逸足未敢騁
丈夫志四方跼促困鄉井

捧檄事遠遊遙指蠶叢路
自顧年就衰遑云有建樹
召杜龔黃策講求愧無素
醫疾執古方投藥恐屢誤
且喜

觀錦江壯波掀天怒

萬山夾江流千里直奔放南賓城面江一片平如掌仙
樓據高峰遙望生遐想玉霄月明時何人跨鶴賞一官
如桎梏俯首在冀壤

酷暑困炎蒸揮扇不停手束帶坐肩輿真愧牛馬走肩
輿入山行艱險得未有喧呼各奮力牽挽費眾手怪石
擦虎牙十步折八九關時返縣門案牘待已久

鹿鳴寺

東坡遊此聞
鹿鳴因名

茲山近城市幽僻少行躅散步涉層岡乃愜平生欲古
樹如奇鬼橫來將人撲怪石蹲道旁窮獸爪牙縮東廊

開明窗萬竿攢綠玉清風自往來炎蒸忘三伏少憩到
前亭曠然豁心目江流白茫茫嵐光青簇簇且喜滌塵
顏石泉清可掬昔日玉局仙勝遊誰能續

睡起

睡餘望清江倚窗傍漆几日光映波紋晃漾無終始默
坐誰與言偶借管城子得句任遲遲塗鴉倏滿紙飽食
聊消遣跌宕亦可喜人生各有好孰能明厥理英雄悲
髀肉願裹馬革死名士藐萬物好鍛究何美障簾固堪
嗤三公亦偶耳是非漫品評一笑忘彼此光陰逝不留
有如此江水

道旁丐

噉噉呼道旁丐錢聊謀食百結懸鶉衣天寒跪沙石遙
望輿馬來號乞聲愈迫來往閱客多空手竟無得我棗
不遑解悲憫終何益四野霜風來蒼然送落日秉燭宿
旅店撫几嘆終夕予亦爲民牧當官究無策儒生詔經
濟空談仗簡冊簿書期會間功業咸嘖嘖

黃葛樹

蜀中此樹最爲奇特
濃郁茂密枝幹怪偉

蜀中黃葛樹離奇得未有高可二三丈大或蔭一畝青
蔥枝葉茂恢詭閭歲久盤根絡石崖鬱屈蛟龍走枝幹
撐風霆奇鬼伸臂肘癭如人負囊穴如獸張口下分上

忽合中空外不朽皮脫筋骨纏瘦硬銅鐵偶所見雖各
殊厥狀咸怪醜未肯中矩獲詎屑雜薪藉日光不到地
風葉聲亂吼匠石驚卻顧疑有鬼神守我欲加品題木
中支離叟

庭樹

幼時戲庭內棗花滿院中移來自海州不與眾類同

相傳

刺史公罷海州帶種來

秋至掇其實登攀偕兒童棗樹旣伐盡桃

花春更紅接枝有老槐濃蔭招清風阿母方盛壯與嫂
業女工列坐庭樹側笑語指花叢小妹纔了角與吾戲
西東吾壯旣授室娣姒亦和衷母恆相顧喜一庭樂融

融桃樹枝葉枯嫂氏疾病攻妹長嫁未久臥病守藥籠
零落如桃花冥冥理難窮母氏日就衰衰病藥無功庭
槐非昔盛枝禿似老翁春至發萌芽誰望氣鬱蔥秋來
映疎月誰望光璿瓏庭樹可再植笑語難重逢魂魄猶
戀此泉下信誰通老妻復多病血枯耳半聾夜坐談往
事淚落不可終遊宦在巴蜀遙望北飛鴻

同弟薇堂回東將近兩月作此志感卻寄

在成都

暑雨增夜涼端居起離憂爲念遠行客一去不可畱山
川忽異方道路阻且修去歲故鄉來車馬共小阮賴爾
送妻孥相見未恨晚渺渺渡黃河遙遙陟隴坂棧道幾

千里縈紆迷近遠錦城喜連牀風雨雜歡笑同舟下長
江憑窗恣遠眺波浪幸不驚擎杯時共酌南賓住五月
仙觀探幽奧所苦廉俸薄未敢慕輕肥卸篆守旅邸朝
夕影相依囊罄貸無門何能送爾歸遷延屢改期僮僕
暗嘲譏爾留豈不佳念爾有弱息山左壘荒旱閭閻方
艱食爾來既不易爾去費又窮往返萬餘里勞勞似飛
鴻拮据辦行李徒侶攜刀弓送子不出門亂山儼在目
念爾體素羸惟望加饘粥將去苦遲留既去恨太速來
時當初夏今茲又夏初里門應不遠計日返舊廬聚者
想欣慰離者當何如念爾祇一身焉能兩地居

叔父及
長兄家

居未得
同來

苦雨

自夏洎仲秋淫雨連綿八甌蛙得意鳴杲日見亦偶甫
慶晝無雲夜聞雷復吼簷雷繩不絕含愁頻搔首屋中
設盆盎牆間青苔厚杜門幸無客街巷斷趨走家家壁
傾圯妻孥默相守菜蕒萎廢畦稻熟棲隴畝父老同嗟
咨嗟咨將誰咎傳聞齊魯間憂旱漲塵垢胡不移甘霖
兩地各分割雨暘或非愆祈禱仰
元后
每旱上必設壇致禱
皇天鑑至誠災戾亦何有無乃人心險包藏逾山藪積
穢干天和召殃還自受况乃弄兵戈跳梁驚小醜
夷匪滋擾

鬱鬱殺氣盛億兆徒疾首願得心光明正氣燭牛斗萬里卷浮雲曦光照戶牖

食菱有感

美人盪畫槳南湖破曉烟湖中何所有有菱亦有蓮蓮花娟且秀蓮子滑復圓紫菱何纖銳稜角峭而堅微觸恐傷手皓腕孰敢舉胡乃蒙採摘蓮子共比肩剖之白如玉入口欣芳鮮厥狀肖蒺藜內美竟獨全深感美人意不肯遽棄捐

東瀛移居闢地作圃菊花大放

秋容淡如洗清氣逼水石喧喧城市中似造幽人宅種

菊盈小園羅列雜黃白冷豔驕上春孤標存高格風露
晻良晨主人布瑤席泛酒綠溢樽簪髻香滿幘卜地遠
塵囂巷僻勿嫌窄芙蓉昔繁盛今存不盈百獨有傲霜
枝晚香共護惜編籬勤澆灌幽芳勿輕摘譬如得高士
歡然永朝夕更宜栽松篁霜雪凝寒碧婆娑娛歲暮不
彫稱三益

川中鼠

穿墉初未覺黨類遽相引白晝猶畏人昏夜動蠢蠢登
案翻舊書窺盞飲餘茗有如不速客垂涎共引領漸乃
肆猖獗拍案不知警逐羣聲啾啾奔竄力何猛有時潛

窺伺意態何暇整聳鼻左右顧內躁外示靜嚼齧徧篋
箱貪腹必欲逞僭伍忿鬥爭跳擲觸器皿主人不遑寐
夜半燭急秉我起彼已伏纔睡彼又騁黠者獻奇策置
毒誘以餅似違好生心撫衷耿耿或欲聘狸奴力能
制頑梗朝夕飼魚肉得失略相等窮究弭患術忽焉發
深省室中地覆板篋席幕其頂旣得藏身固若遊無人
境木腐蠹乃生窗裂風斯冷除患不塞源應爲智者哂
日日勤捕逐得安僅俄頃蔽障痛抉盡何處匿形影其
技本易窮夢魂得安靖

浣花溪修禊

錦里豔陽時觸目絢金粉出郭六七里修簞古寺隱草
堂緬遺像蒼癯含悲憤清溪橫板橋嬉遊雜齟齬我輩
且嘯歌諧笑爭搖吻大雅卓千秋孰能採其蘊俯仰閱
古今榮謝等朝權撫序快當前勝地絕塵坳轉眼又送
春尋芳忘遠近歸來萬象空倦臥如寒蟄

李紅樵招飲枇杷晚翠齋

得杷字

春光每辜負城市饒喧譁草堂昨遊眺鼠姑正含葩有

客詩興豪復約訪仙家

紅樵初邀遊二仙菴

仙家杳難卽蓬萊道

路賒

以小故不果遊

且可坐小齋風爐煮新茶佳什爭快讀雅

韻洗箏琶亦復出畫卷老判張蓋斜

紫垣出白描樵植騎牛圖頗奇古

俠女秀且猛寶劍舞青蛇

紅樵有指畫俠女執劍怒視

窈窕畫春山

紅白花半遮

紫垣以桃李山房圖索題

諸君盛文藻品題互競誇取

友如醴淡標榜古所嗟芝蘭沐餘芳砥濯去垢瑕穠豔
謝桃李晚翠共枇杷酒閒門險韻行吟手頻叉翦燭屢
見跋庭樹啼棲鴉

和趙竹菴巴州懷友分韻詩

以何當共翦西窗燭卻話巴山夜雨時分

韻得燭字

山水與友朋平生願亦足友朋別恨多分飛如黃鵠安
得素心人時時話衷曲趙子意氣豪捧檄來巴蜀薄遊
寄萍踪寄萍踪屋亦超俗開軒面清池花底鴛鴦浴秋風連

夜催曠懷多悵觸雲山恨綿邈歲月悲偏促詩酒舊因緣良會何時續西窗月易斜燈紅酒更綠此時聯古歡何辭屢翦燭出處各有營人事苦拘束分韻寄同儕知君風義篤三復義山詞佳言如金玉

遨頭日與黃梅樵趙竹菴彭海樓楊賡堂宴香葉亭

昔聞蜀太守遨頭稱最盛士女耀綺羅花竹互掩映今我寓錦城出遊纖塵淨與馬無喧囂未睹明妝靚何必浣花溪古祠堪傷詠荷葉小於錢澄波圓如鏡蔭庭柏青蒼倚籬石瘦硬鵲髮見羽流淡泊我心敬好友五六

人銜杯且樂聖細懷臥龍公治蜀有嚴政嬉遊官未暇
富樂民共慶宋時趙清獻廉潔稱後勁吾儕乏遠猷敲
詩究聲病偷閒來近郊亦似出檻穽縱不見古人聊云
適吾性

題畫

雲木蓊然合山色濃欲雨綠陰蔽驕陽不知日已午溪
盡忽逢人忘形似太古語惟及桑麻喁喁相勞苦雞黍
共結歡莫辨孰賓主

勝地如桃源買山未肯售綠蘿掛長林觸目盡蒼秀琤
琤泉鳴壑磅礴雲吐岫挾杖共婆娑山靜人多壽蓑笠

傳子孫未暇慕文繡努力事春耕賃犢券已就

秋山如高士骨瘦容愈整清流何處來搖蕩青山影太
空卷浮雲塵氛知盡屏又如洗鉛華美人曉妝靚何人
觀物化澄懷對靜境茅亭豁遠眸楓葉紅半嶺

我從雲棧來萬峰狀難肖磅礴勢鬱積獨惜乏孤峭依
倚似黨附未如此娟妙蒼然拔地起嶽崎少同調青山
自古今幾人樂登眺安得升絕巔劃然一長嘯

題孔東辰小照

先生清如鶴翩然振六翮何時落人間風塵無此客偶
出宦江南曾未損高格林下樂盤桓素愛在泉石奕世

傳儒風闕里存故宅訓子久成名與我輸肝膈展圖睹
道貌輕衫脫冠幘微祿久捐棄腐鼠同一擲囊琴不須
彈仰視秋空碧

與白梅村吳石泉蕩小舟由獅子橋至觀音閣

在

昌三
里外

暇日出北郭循此衣帶水小舟容三人順流任逶迤
翻驚鷗鷺潑刺躍魴鯉兩岸菜花黃倒映綠波裏鏡空
萬象聚心定覺水駛清風徐徐來送我閱芳沚石橋互
長虹穿過疾如矢昔人乘長風巨浪排空起萬里快雄
心驚懼或擊齒何如此安閒坐愛風日美凌虛有高閣

傍水立基址憑欄共登眺瓊杯酌綠蟻還看往來船泛
泛鳬雁比

梅村邀遊碧雲寺

榮昌城西南

僧舍淨無塵雜樹青如沐牡丹含芳苞掩抑開不速知
寵富貴花油幕高於屋牆後餘地寬森森萬竿竹青松
閒疎梅籬外欣聚族僧人不解事似將佳客逐高士耽
閒寂佳人泣空谷聞道春回時寒香媚幽獨自恨來遊
遲作吏毋乃俗何爲偏責僧隨境且娛目

遊臥佛寺

水田簇秧鍼倏忽已到夏言尋古蘭若凌空起臺榭曲

折磴道盤入門老僧迂石佛自何年枕肱此閒臥金像
煥諸尊環坐觀物化傳聞昔盛時香燭炫高價士女四
方集舍施無晝夜世態每炎涼神運有衰謝欲上最高
層日暮恐難下小飯香積廚葱葱遽命駕

卸篆後無事多睡

高枕辰未起起後枕復就心閒身更慵迢迢嫌永晝好
鳥語簷端雲癡不歸岫綠樹結層陰青苔綠如繡始憶
夜來雨鏘鏘瀉奔湍俯仰四體舒似兵脫甲胃賓客亦
蕭閒階前觀蟻鬥

眷屬先赴省憶孫阿京

百事無一遂惟孫能娛老讀書水瀉瓶時復索梨棗喧
呼習僮婢啼叫令翁惱數日離膝前閒寂心枯槁始悟
嬉戲童無心似合道猖狂與天遊顛倒無不好人生苦
拘束頭白應須早

夙愛

夙愛水與竹吾鄉難得遇每過好園林徘徊朝至暮捧
檄來西川深快愜吾素修竹千萬竿青蒼夾道路清波
喜滌澗往往懸瀑布茅簷三兩家龍孫雜烟樹斫伐賤
如蓬懷貞誰與訴有水皆灌田隨車奔如鶩吾欲縛茅
亭四面琅玕護綠水圍周遭駕舟方獲渡風吹響笙竿

月照起蒼霧解帶坐匡牀蕭閒自搜句富固不可求清
福造物妬幻想付子虛行止有定數營營逐囂塵何處
領幽趣

苦雨

簷滴溢階墀陰雲壓屋密沿路行旅絕居人閉不出成
都前苦旱父老暗啾唧連縣勤祈禱官吏懷憂恤此邦
幸得天雨期曾無失胡爲連日陰飄蕭飛雨疾上漏頻
移牀青苔欲入室多恐秧根壞仰望祝白日余方賦閒
居卸篆屏法律啓行漫改期端坐風蕭瑟遙望錦官城
得雨未敢必

自署移寓

承乏旋賦閒官場真如戲但苦權到手未得遂夙志豈
盡全善良何由剔奸僞利害關民生榮華須臾事不能
答君恩何必羨高位前來此暫居今復來寤寐想彼槐
安園升沈應無異

新晴

久雨積陰氣溼霧壓城闔晴光暫一照萬物覺鮮新田
苗逗青翠禽鳥樂及晨南窗披書卷眼明豁夙心花瓷
進香茗俯仰對古人迢迢浮雲外羲和轉飛輪

作詩

欣然有會心聊復寄筆墨抑鬱結寸衷亦偶抒否塞摹
宋與宗唐世間矜耳食跼蹐行墨閒腎肝勞雕刻搏摻
或皮毛胸中竟何得素志親風騷望洋歎無極大雅共
扶輪箇箇堪矜式貧女乏錦機素絲寒夜織縞衣自縫
紉俯仰慚華飾工非媚世人拙亦瑕難匿天地自寬閒
萬物非逼仄左右供取攜何爲走荆棘

同鄉劉君瀕行復送一詩

送君君將行欲語聲還吞雲帆未及掛且復話酒樽家
居幸非遠屋宇若比鄰君今返故里應見吾弟昆吾兄
年衰老力瘁目已昏吾弟方壯健衣食苦崩奔聞道歲

頻旱貧居難自存吾與君久處君固悉根原聽訟每無
暇才短敢憚煩臨鏡知明暗飲水知清渾儒風本寒素
儉樸夙所敦近來有何樂且喜弄雛孫家人問近況憑
君細與論雖有千行書不如君一言君行數千里勸君
加饗殮地既易南北天亦殊寒溫夔東啼杜宇巫峽有
斷猿波浪如激箭關山消旅魂不啻客途險安識鄉居
尊跋涉雖云苦壯志聊得伸願君還復來相與看峩岷
曉雨

小雨方得晴纔晴忽又雨臥聽簷溜鳴碎點如擊鼓連
屋相呼應丁東似有譜搖樹來狂風吼怒竄乳虎造物

逞雄威餘勇如可賈旅客心憂煎披衣坐待午濃雲失
前山急浪漲遙浦不聞鳩婦啼但見商羊舞忽憶今考
試文士蠶絲吐巨手抉雲漢誰將漏天補

與白梅村吳信卿顧席齋登臥佛寺樓至碧雲寺

小酌

鬱鬱叢樹中樓觀亦何壯倚崖石磴盤如出層霄上倚
欄四望遙青山作屏障城郭在眼底萬室互相向水田
烟明滅蒼翠難爲狀天日正放晴俯仰喜超曠連朝苦
陰霾到此氣一暢復約碧雲遊花竹欣無恙當軒快脫
巾玉杯酌無量昨恨爲雨阻此遊神愈旺有志事竟成

努力無相忘

夜聞蛙聲與院內青苔閒諸蟲相和

雨後滋青苔汚池行潦萃聚族蛙亂鳴兩部矜鼓吹細
細或低吟唱和各引類按拍雖無心抑仰如抗墜幽咽
或不平叫噪聊嬉戲初厭入耳煩漸似有清致恍惚聞
鈞天羣仙於焉醉未覺渤海寬狹此尺寸地大小兩相
忘一杯陶然睡

漫興

大地變黃金五穀何處植明珠盈筐筥饑來不堪食人
人皆石崇若箇任耕織萬事有乘除智士莫惶惑貧需

富者財富賴貧者力意若各自謀相倚不相賊轉瞬忽
變遷造物不難測斟酌器大小如分還厥職慎勿分外
營有蹄欲生翼

浮雲

浮雲在空際無翼亦自飛清風借與力白日映光輝徘
徊若適意飄忽將安歸蓬顆隨地轉仰視未敢希倏然
雲滅影泛泛同無依

蜀俗

水田在山巔山下結茅屋獨處每無鄰環居多竹木健
婦勝似男赤足驅黃犢繞門稻離離垂簷花馥馥芋豆

兼諸芽一歲有三熟風雨每應時祈禳煩巫祝所慮盜
賊多恃官爲驅逐我亦司牧人慚愧食天祿

守城詩

太平訓導魏詩
殺賊三百餘人

蟻賊蹂兩川履山如邱垤馳突破縣城不畏堅似鐵太
平彈丸邑無城更杌隉賊來塵蔽天萬家聲嗚咽令尉
俱他出捍禦誰團結守卒僅半千疲病足燈燼冷官獨
慷慨鼓勇膽氣決諄諄諭士民忠義共激切迺遭樹門
扉樓板縱橫截健婦男衣冠執殳備行列二千子弟兵
憤起丹心熱跳盪振臂呼殺賊湯沃雪不謂文弱士一
人能提絜微員作干城堂堂樹大節匪徒素鷁張陡然

傾跌萬人共一心賊匪應早滅

庭花

去年庭宇曠地淨無纖塵幼孫庭前戲栽花長過身曉
露垂珠顆紅蕊照眼新今移玉沙住

玉所居巷名
沙街

樹鄰依牆花成列開落何逡巡
胭脂紛零亂青苔鋪未勻
幽陰溼氣盛枝葉鬱不伸
采摘戒僮婢秋并倍可珍

憶榮昌北郭小溪

纔出城市外危崖下急湍鏗鏘振金玉六月生微寒幽谷何逶迤兩岸夾琅玕樹密鳥語雜風碎聞間關每過

惜匆匆輿馬不遑安清流環雉堞遠逝態何閒細民具
舴艋來往翠樾閒錐刀逐微利小舟皆載炭誰得開心顏我
欲結茅亭倚傍碧玉灣

買書

閒居鬱無聊未能飲玉斚素癖耽書卷荊州未許借微
服遊市塵縹緲亂插架兔園冊盡揮祕本偶驚詫良賈
伺顏色居奇索高價酬值屢典衣無米妻孥怕流覽忘
饑渴披讀連晝夜謝客且杜門敬將古人迂欣幸如獲
珍咀嚙似啖蔗所恨積無多涉獵旋已罷大意雖略觀
穿穴未得鐫貧兒烹太牢快意平生乍腹笥誰便便文

壇獨稱霸壘叩應不窮黃河水倒瀉富博意氣豪凌雲
構臺榭班馬今則無韓蘇難方駕文人多矜誇侈張將
人嚇胸懷富五車古今思凌跨雖無傾國姿珠翠可炫
嫁雖無由基能挽強可命射錨銖鋸勤累積慎勿求速化

岷江

長河互北界大江劃南疆捧檄來蜀地驚駭歎望洋浩
浩積元氣浮浮散晴光繞郭誇濯錦溉田慶歲穰大編
與我舸百貨共輸將其流載高艘其源僅濫觴吞納諸
派合蟠曲自大荒羣山列屏障奔走隨飛颺鼉鼉忽吟
嘯百怪舞混茫英風懷李守斬蛟耀鋒芒萬載息怒浪

東下流湯湯巫峽緊束縛一線窺天長輕舟涉千里頃
刻來荆襄漢水倏然合氣勢更披猖王公昔設險天塹
誇周防躍馬失白帝鐵鎖非金湯沃野號天府坐閱幾
興亡江山終古在炳靈煥文章儒生遇聖世流覽氣
激昂開拓萬古胸雲夢吞何妨人代去飄忽江流自奔
忙秋風捲波立四顧天蒼涼與誰共道古岸下石犀僵

買菊

九月未隕霜石徑滋苔蘚藝菊素憚勞枝葉費剔翦老
圃頗幽閒種植逾九畹秋來齊放花紅白雜深淺擔負
向市頭紛披待客選嗟彼高潔姿塵囂未能免猥辱賣

菜傭帶露泣猶泣我見每低徊不惜將衣典階墀妥位
置幽韻一朝顯軒昂頭屢搖困蘇葉猶卷耐久得良朋
相遇何辭晚

從軍行

夜半羽書催束裝不得住山川鬱青蒼朝夕犯霜露沿
途供馬騾役夫先期聚深恐誤程期鞭箠一何怒請君
且霽威有人迎前路

平昔矜任俠橫行少年場睚眦偶忤意厲劒耀鋒芒官
吏不敢問酒樓挾名倡詰朝隨營去意氣何飛揚朋儕
傾城餞道路生輝光

旌旗采紛披前已摩賊壘主將期深入誓當朝滅此私
鬥何奮揚見敵乃畏死死亦非鬼雄輕將鴻毛比丈夫
未立名何以垂青史

朝廷固邊圉不貴多殺人國威一旦挫壯志何由伸深
夜鬼暗泣滾滾飛青燐野外多白骨或恐是吾民狂賊
蹂躪後寂寞委沙塵

百年受君恩此身非屬我千古英雄人奮志貴能果一
鼓不能起貽笑在同夥首領縱保全立功計已左君看
凌烟上芳聲至今播

軍令肅秋毫閭里共獲安寄語同行輩雞狗亦勿殘讀

史悲亂世流離爲心酸我亦有家室婦子幸得完高僧
酬死士但願輸心肝

山蠶歌

山東程公任黔中正安州教民養山蠶並收繭繅絲諸法民食其利旁及他郡有廟

至今血食惜未審名諱及何縣人

龔黃久無聞斯民日憔悴邑宰非循良唐虞何由致吾

鄉有程君廟食在黔地程君有何功爲官能興利山木

號青剛

蜀中俗稱

彌望葉蒼翠居民伐作薪黃落輒委棄君

謂可養蠶遺法胡不試擇樹布其種食葉無煩餒收繭

教以方縑絲製以器官不憚勤勞吏不嫌瑣細比戶業

漸豐子孫以世繼兒童頌侯德父老皆垂涕去歲君男

來贈金五千計廉吏豈難爲祇貴畱遺惠何地無利與
大惠原不費程君位雖卑斯謂不曠位青史縱無傳口
碑自詳備

哭紹曾姪

三月十一日病卒
十月初三日得信

突聞鄉人來一笑心欣悅開緘讀書札舉家共嗚咽阿
咸三十餘不信乃夭折孩提母已亡恃姊相提挈稍長
歷苦辛薪水勞瘁前年送孥來送余舟口至川激昂肝腸熱
敦樸類吾兄吃吃口更訥指使令無違處世無嫌拙告
歸何太速關山幾超越迭值歲凶荒恨無糠粃齧繼母
分汝出黑瘦愁見骨半年邈無音一旦成永訣余本寡

宦情如馬負羈縻何時賦遂初家督汝首列天胡降咎
殃銜悲何由泄汝亡子女幼汝父筋力竭目瞽耳且聾
寸衷苦鬱結指臂無人代何論甘旨缺汝病吾不知汝
葬未臨穴汝嬾夢汝來牀前立恍惚汝弟食不甘行臥
意騷屑汝叔未目覩繫戀何由決汝父當此日料應腸
斷絕一家骨肉分都緣貧迫切迴風蕩落日寒霜厲素
節相隔萬重雲魂隨光景滅作詩當痛哭字字化爲血

紫芝詞

有客歌紫芝紫芝生何地觀君號葦杭龍化推仙吏壘
石作假山空庭聳蒼翠煌煌產紫英賓從驚相視賦詩

各門奇誰敢輕軒輊我素識觀君德盛容溫昨分韻未
及我雲山杳難至客且聽吾言此物稱上瑞謂兆謝庭
蘭石麟天久賜謂供商山採君不衣荷芰我素識觀君
觀君善養志菽水昔承歡艱難思不匱今幸祿養豐彩
衣堂上戲誠孝天所嘉靈物感以類青青傍慈竹濃蔭
炎可避鬱鬱映茂萱甘露良宵墜三莖特呈祥輪囷表
靈異餌之能延年山谷搜非易胡乃生階墀疑仙爲母
致寸草戀春暉百年可預計我詩遙寄君君喜書壽字

韋杭寫大
壽字奇肆

詩詞雖不工勝作芝閣記

未禪刺史邀飲出所藏書畫冊卷共閱

巷僻車馬稀幽寂似林麓入門翠遮天芭蕉高於屋海
棠冬吐華菊殘猶芬馥主人一笑迎苔痕屐齒蹴几案
羅圖書燦然驚眾目卓犖石田翁老筆破邊幅枝山超
軼才揮灑千毫禿寫生有瘦瓢邊鸞首應伏最愛磨崖
碑氣象獨莊肅如觀禹鑄鼎怪偉驚鬼族如天羅眾星
磊落光芒簇餘多希世珍珠玉紛出園是皆絕世資高
步無拘縮潑墨怡性情縱橫惟我獨世人欲效顰胸次
塵十斛描摹求毫芒刻鵠乃類鶩先生老詞壇嗜古甘
勝肉掛冠囊無金買宅園有竹賓朋屢讌集新酒巾可
漉余亦困宦遊逐塵慚碌碌何日買青山林間驅黃犢

王依孺人觀君葦杭之嫂也夫亡無子太翁衰老

勸娶朱太孺人生葦杭

精衛志填海力微溟漲闊魯陽揮白日虞淵義輪落獨
有志節存造物難束縛艱難彌缺欲千秋義卓犖懿哉
孺人德風化維閨閣夫亡翁已老嗣續將安托宗支可
承繼血氣終隔膜呼天天無言庸夫委冥漠孺人籌量
熟宛轉通媒妁無姑欲奉姑憂戚轉爲樂鬼神渺難測
誠孝天所祚弄瓦初望失得男喜再索翁倏歸道山共
姑撫幼弱甘旨饋必豐束脩禮無薄教讀名已成仙馭
駕鸞鶴鸞鶴不可追瓜瓞綿世澤夫亡有子繼翁亡待

安魄姑喜膺章服叔欣靡好爵盡屬孺人力辛勤猶如
昨祿厚家室康孺人不可作志定山可移正氣森磅礴
婉婉嫠婦泣經營裕偉略幹旋迴大造俗士莫驚愕歌
此備采風萬古心胸拓

和書碩農

雲重怯曉寒泥滑阻舊雨虛室寂不喧四座閒玉塵朔
風振北牖冷烟結南浦時時展遺編抗懷邈千古樗材
甘蘗落胡爲伴簪組西窗共翦燭相期話農圃

哀哀小癡

雲南拔貢以知縣分發來川未署篆而卒年二十七

皎皎如玉樹英年氣和藹作詩擅風華餘事兼工繪憶

在長夏日炎蒸雨未霈共往薛濤井浮瓜作良會捲簾
看奕棋竹風鳴爽籟雉堞映江流塔立夕陽外丐君作
畫圖蒼茫寫勝概數日不相聞腰寬沈郎帶手書猶通
問枕席竟狼狽子幼親已衰倉皇棺遂蓋有官等無官
天道何茫昧滇南路遙遙何由返素旆旅館風蕭索俯
仰安所賴人世有坎壈慘酷此爲最神氣歸玉樓塵垢
遺委蛻雲際翔鸞鶴放眼宇宙大呼之邈不聞一杯聊

田家詩

田家詩

天寒閉柴扉朔風捲茅廬供炊自有婦代步亦有驢親

故歡然來爲黍兼烹魚衣冠旣樸野行坐禮數疎苦道
風俗靡婚嫁費踟躕家口近益增饘粥不易謀明年春
雨足相勸荷犁鋤

桑棗互掩映蔬圃亦接畛小釁時詬誶父老戒相忍不
見東家豪訟後迫饑窘有酒羣呼侶濟阨或指困累世
長子孫田廬幸無隕慎勿慕遊俠相與安愚蠢

生長閭里閒老不識官府未敢涉江湖惟願涵牧豎稼
穡衣食本作勞詎云苦豐凶誰能料朝夕卜晴雨教子
略識字稗官說今古春秋大作社得意亦歌舞田租幸
早輸勿勞吏胥怒

空倉喧鳥雀亦切卒歲憂吾儕之遠慮一飽復何求所
慮籬籬折覲覲來狗偷殷勤囑婦子栽棘預綢繆秋霜
昨夜至落葉風颼颼豈無遠行客衝寒不得休何幸得
宴安團坐話西疇

裘馬耀閭里聚觀盈巷陌云是貴家子祖父曾執戟僕
從旣煊赫亦復美田宅自顧鶉衣單終歲糟糠窄彼氣
何崢嶸千金供一擲天運有代謝人生不滿百朝爲席
上珍暮作溝中瘠魂魄慚老農生未辨菽麥

哀紹曾姪

前有詩哭數旬後復悵觸作此已忘前詩矣今俱檢得乃兩存之

七歲已失母煢煢安所仰稍長任薪水奔走勞萬狀受

過遭斥責順從無怏怏家貧百務艱兄衰惟汝仗捧檄
吾來蜀萬里遙相望汝來殊不易一見神歡暢久畱旣
不可旋歸徒悲愴

丙申隨任之鄧
都明春即歸

去年得汝書詳悉述

近况繼母命分炊所幸體無恙吾意殊拂鬱憂汝乏瓶
盎連歲東國饑粟布孰相餉遙遙寄數金絲毫分薄貺
金到汝已亡棺蓋債未償汝婦先歸泉同月悲死喪

先妻

亡呱呱遺兩雛無知淚咽吭汝父目久盲白頭送汝拜
他日歸鄉園舉家相依傍胡爲竟摧折忍痛何能忘道
遠傳聞異致死難揣量饑寒未周卹默愧自惆悵汝性
本馴良鄉里無毀謗長厚如吾兄臨老失供養寄聲喚

汝叔謂四弟入蜀涉層嶂附載汝子來朝夕永相向心

長力綿薄汝魂應吾諒

雜詩時在新津

所至皆傳舍數椽安如素軒窗豁達開隔垣森竹樹高
臥避炎蒸清風颯然遇蟬聲斷續鳴鳥語含天趣忽念
囹圄中熱惱那可度咫尺苦樂異有懷誰得吐奢望責
天翁逾涯良可怖

昨出候達官飛塵撲輿馬行人喘未蘇赤臂汗如瀉成
樓窄容膝暫息敵廣廈對列花數株紅白照曠野才人
嫁厮養何處呈豔冶安得植園亭對爾傾杯斝

震雷起暮夜農夫咸望澤雨淋簷溜鳴侵階水盈尺河
聲怒如吼魚龍喜跳擲竹樹烟霧迷晨起翠黛積旭日
影微茫炎暑掃無迹燕雀喧相賀遙天但一碧僕夫告
行役忽忽呼冠幘

微雲韜白日涼颼拂面柔行行厯村落徑僻境彌幽上
覆碧琅玕下蔭青瑤流水碓吼怒雷噴雪翻玉虬秔稻
方吐穗彌望綠盈疇生平耽野趣渾忘路阻修况值新
雨後蒼茫暑氣收從人覓瓜李到處足夷猶

古人不可見但見古墓存古墓漸削平貴家起宅園上
爲長夜飲下有千載魂古今同一盡轉瞬化平原王喬

不可追哀樂誰與論

炎蒸苦難耐思欲濯江水胡爲延眾賓衣冠進累累賓
厭揖讓繁主人疲欲死揮扇汗流珠何暇論甘旨處世
務酬酢從俗聊爾爾返慕晉人達脫略良足喜

牆外修竹數百竿前任宋由溪栽

交卸多
斫去

不可居無竹幽人耽雅趣官舍短垣圍籜簌簌冒烟霧忽
聞斧丁丁千竿訝倒仆束縛葉離披蒼翠猶帶露天光
漏斜陽何處宜晚步前時栽種勤奴僕知愛護何不赦
籜龍畱比甘棠樹一時失綠陰鳥雀俱含怖

有感

五年須與閒違別故鄉樹遙遙訪戚族已多歸荒墓况
復當盛年芳蘭委霜露迴憶歡笑容杯酒永朝暮逝者
不復回存者良可懼淘淘東流水驚波相貫注世人競
錐刀紛營猶如鷺匡牀夢醒餘明月正東吐

父老歎

甘雨屢及時稻秀滿平田竊爲農夫慶茲歲占豐六路
旁遇父老顏色慘不歡借問何所苦父老再拜言成都
地肥沃灌溉賴江湍穀收稅斂薄皇恩覆如天茲邑
值衝道絡繹冠蓋繁輿馬及酒漿追呼夜不眠所嘸一
邑中苦樂難具論貧守尺寸地豪富連陌阡計里但均

輸差役未許偏追呼朝夕急里保每逃奔羨彼居僻邑
安樂快如仙納糧官事畢婦子足盤餐同爲編戶氓休
戚共相關胡爲受鞭扑歲歲無息肩一視得同仁供役
敢辭難我聞父老語愧汗強勉旃率土受渥澤王事力
應殫均役吾未能捶楚吾心酸積久勢必返改革俟後
賢誤公有重罰努力且自寬

署新津月
餘卽交卸

憶顯亭大兄

少小不相離庭堦共嬉戲追逐閭里閒提攜不謂累余
性幼頑劣偶拂色憤恚轉瞬隨身後同遊曾不棄共几
誦詩書共被通夢寐阿母或嗔責有過每予庇稍長各

有營分離始感喟薪水兄獨任筋力日衰瘁貧戶支持
難艱苦味兼備萬里雲棧險分手各垂淚不謂老喪子
去歲曾姪病沒朝夕誰奉侍况聞病臥牀醫藥煩省視兩目既
無覩幼子年方稚厚德遭遇酷彼蒼果何意壯時不扶
持暮年若遠避朝暮思顏色欲見無雙翅默自數愆尤
反覆愧無地厯想平生歡種種苦難記空寄數行書恍
如無一字盼望鯉信來平安幸無事

將歸成都

官舍苦逼窄東西各分宅

由溪居中舍余居東

屋後有荒園蕪穢

新開闢窗扉喜疎豁案可羅書冊微雨滋苔蘚草生已

沒屐濃翠露珠凝鬱茂反勝昔榴花紅幾時結實已可
摘生機不暫停陰陽如相迫忽忽我將去未知誰主客
鴻飛無定蹤但畱泥爪迹

卸新津篆

莫輕百里才百里才非易聽訟與察奸眾務一身萃况
復蜀民悍玩法無不至帶刀如佩犢殺人等兒戲茲邑
雖彈丸臨淵似欲墜又如馭奔馬倉卒恐失轡少年慕
縣官煊赫鳴得意搏捕聚寶僚衙杯長夜醉花竹繞幽
居高枕或舂睡不謂作官苦妄意閒無事身歷方思艱
鉛刀略嘗試駑駘困道途伏首愧良驥小吏不易爲何

敢望高位

閒居

日長方宴坐閒看竹枝裊薄雲遮淡日蟬鳴樹深窈
昨到幽人齋入門見紅蓼廊靜晝不譁輿馬客來少人生
幾日閒忙忙忘昏曉今朝得從容喜無塵事擾方知林
泉士高隱情非矯

漫興

天地如此大生人不可數不知一日閒幾樂幾悲苦彼
蒼若不聞冥冥誰爲主毋乃都無心撒手如搏土試看
萬類繁變化隨風雨人心多智計荆棘生肺腑吾生天

自完胡爲戕以斧無嫌深谷士寂處性樸魯

去齒

齒痛如抱病齒落蹶然喜欲落不肯落爲累伊胡底左
右已無鄰顛危將誰倚語言已含糊况敢噬乾肺尸位
當賢路偃蹇不聽使念彼骨與肉係戀亦恆理氣血从
不屬強附終可恥何惜一箇弱去者已纍纍有客自外
來從容爲奏伎敷藥塞厥竇小鉗利燕嘴蒂落不待熟
生摘蛻已委脫然如決癰眾味悉甘旨凡事審利害求
成道在毀姑息不忍決毋乃養奸似療毒或刮骨况乃
僅鑿齒

由青神將至嘉定

赴興文任

山形如長蛇起伏未肯住江勢如奔龍崩騰挾餘怒西
蜀天下險恃此爲擁護英雄幾代興豪氣相吞吐城郭
亦非昔古人渺何處我本東海樵薄宦等流寓壯志隘
八荒竟爲塵網誤俯仰增感喟有懷欲誰訴翹首望三
峩蒼蒼迷烟霧竊聞達人言古今猶旦暮載酒遊凌雲
還問嘉州路

曉晴

紅日出雲端萬物都了了赤光落江面金蛇騰天矯山
脚宿霧黑水外人家少纔過大佛足烟波遽浩渺豁達

天宇闊舉目送飛鳥恨不生兩翼聳身望雲表卻顧往
來客何事日擾擾

雜詩

眾鳥紛啁啾焉知孤鳳凰百草被霜委松柏獨軒昂千
秋有豪俊那復顧猥瑣世情喜柔順巧笑含婀娜人生
貴適志榮華非所圖隱名鳴夷子豪宕游五湖

山行
崎嶇之甚

瀑震四山響徑盤千仞高太陰匿白日雲湧如波濤榛
莽互蔽虧掠面風蕭騷我獨何爲者登頓緣秋毫牛羊
爭險道深谷啼猿狖中有高尚士築室遣塵囂修竹千

萬竿新翠如沐膏婆婆綠陰下笑看行客勞

負炭婦

崎嶇路絕險登降數十仞我來坐肩輿跨步愁難進何
來負炭婦偃僂飛蓬髻任重將百斤泥塗雙跡印豈不
憚艱辛懼爲道旁殪生不識綺羅刺繡線難引勞力聊
覓食粗健兼柔順地瘠苦民眾貧窶不自潤有子逾十
齡隨行步亦迅歸語北方人婦女未深信

雪

蜀居南天末炎蒸苦難免凌冬萬樹蒼霜霰見亦鮮今
朝飛雪花凌虛飄宛轉到地倏已無皎潔高峯顯玉笋

晃日光曉看畫屏展緬懷黃河北吼地朔風卷頃刻雪
盈尺屐齒踏虛輒安得似蜀人草衣雙足跣圍爐話鄉
園暫喜客愁遣

署永寧道呂筠莊故金堂令梁石民又歸道山吾
東老成彫謝可傷也

日月跳雙丸倉卒顏色改我始接二君磊落見丰采故
鄉情彌親所重皆老蒼方喜宦同轍

隆昌屬永寧道轄

一日忽

偕亡燕魯建崇館二君急公義

公所之修筠莊太守典實督率石民時贊修

型杏山河桑梓共垂淚家園七千里何處卜佳城雲棧
路曲盤猿狖晝夜鳴文章取科第意氣非人下宦遊隕

還方勞勞胡爲者歌哭盡夢中生死若朝昏旅櫬無兒
守更悲張曉村去歲曉村歿於秀山無子

有感

何須弔古人古人吾未見目前接紛紜趨死已如箭春
榮發青條秋風倏然變荒草徧原隰邱隴無貴賤心鬥
爭須臾營營未肯倦幾人具達觀淡泊絕係戀醉夢過
一生日光如流電茫茫萬古中山河自永奠獨有炯炯
心不隨氣化轉

歲暮多饋雞雞聚鬪感而作詩

無端羣會合乍聚如泛梗豈挾宿冤仇奮志思一逞金

距踞地勢彩羽厲威猛或躍壓強敵或伏示暇整勢如
不竝立鼓翼更延頸冠血涇淋漓已敗旋復騁廚人磨
刀俟狂肆不知警誰知關方酣客饒已引領湯火悲須
臾肉盡餘骨骸浮沈愛鷗閒貞介慕雉耿爾輩何瑣瑣
爭食不肯靜魯卿起微纒千古垂戒炳兒童喜旁觀主
人默深省

復過玉皇坡

石磴數百級行旅頻息肩山頂弄白日空廓快目前羣
峰若波濤出沒凌蒼烟百里千萬壘灝氣爲聯綿矜奇
各負勢戈戟劃蠻天偉哉造化力高下費雕鐫雲物倏

臨明極詭富神姦及茲有餘憾未造我眉巔雪山塞高
空大江來蜿蜒異境不可望我欲挾飛仙

過洞底望山石

在長寧

璣瓏諸山石結構費天巧翦剔餘瘦骨蒼潤出物表側
立露孤孑連隊逞窈窕倒植或撐拄崛起更夭矯拳曲
透孔穴反覆看幽窅闢妍各自媚異態同者少位置益
益中名山具體小往返恨匆匆未得恣登眺大嚼過屠
門垂涎何能飽

倉穀謠

有序

興文地瘠民貧社倉穀出借春放秋收愚民到

手卽空至期無償往往破家余代庖斯邑有二
千餘石皆疲頑戶也寬之非法急之可憐作此
誌之

枵腹被短褐春耕可力作官倉粟陳陳告貸充囊橐暫
紓然眉急未卽填溝壑泥塗敢憚勞屈指計秋穫水旱
難傾卜荷鋤心憂灼佃主逼歲租倉吏責風約薄田急
求售所苦酬價薄倉卒鬻妻子忍泣書券約愚氓顧曰
前百謀動成錯有宋青苗法始意原非惡至今監門圖
閭里想蕭索今日除積弊征斂恤民癘蜀地稅尤輕萬
戶耽逸樂惟茲彈丸地田窄山錯落哀哀集澤鴻不得

飽藜藿伊余適承乏覽籍初驚愕放民四萬斛前官氣
恢廓那知骨髓竭中或飽鼠雀撫字吾未能催科才力
弱長歎仰屋梁敲朴心愧忤呼號皆赤子安能視隔膜
夙讀治平策至此皆糟粕倉穀數取盈自昔有成格

祭先農壇行九推禮

稼穡爲國本幼歲習豳風四體素未勤髮禿已成翁承
乏來下邑先農典攸崇舉耒僅數步力疲汗已融始知
農夫苦朝夕烈日中躬耕彼何勞坐食我何功還顧世
胄子逸居氣如虹一飯費萬錢欲將百味窮孰知饑饉
歲糟糠或不充

紀異

嚴冷忽如冬被綃且向火賓從圍爐坐談天如炙輶遙
憶北海壩田苗散婀娜耰鋤及時勤就功或袒裸蜀地
氣更暄麥熟風揚簸大雨竟連朝體寒栗礪礪正恐陰
氣盛天時有偏頗共指飛雪霰遶山白絮裏時已逾季
春炎帝來未果今歲閏三月路有凍死孩惻怛匪獨我一夜
皆乞丐凌晨視庭花寂寞開幾朶

出城

草木聳濃綠蒼鬱望不窮四山正出雲微雨過濛濛幽
壑何窮窈流泉隱蒙茸田水似飛瀑層疊響未終茅茨

三兩家蔽虧徑難通是時將分秧翠積方鄧中農夫勤
力作但願年歲豐我出偶遊眺雜花沿路紅欣欣樂涵
育造化不尸功

半邊崖溪漲

溪聲入耳喧轟如車百兩流急礙石橫勢驕得雨壯前
響鬱未平後波吼奔放有似項羽平楚秦至暴亢濁浪
怒捲回漩洑雪花漾興馬力共努石磴盤旋上崩崖誰
摧倒戈戟森相向蹢躅沒鼉鼉穹窿露罔相曲折樹翳
天起伏嶺扼吭入谷視聽眩出險胸襟曠薄雲遮炎曦
微風正舒暢荷篠者誰子前途發高唱

犍爲道中雜詩

江流聲怒號雪浪欲掀舞細雨灑空濛遙山暗無睹石
壁高入雲削煩巨壺斧側緣一徑滑投足懼莽鹵榕根
盤龍蛇枝葉覆如廡與中聊縱目頓忘征途苦烟外一
葉舟嘔啞正搖櫓

斯境稱繁富商賈紛浩穰百肆列廣除石路平如掌呬
暗絃誦聲更雜機杼響側聞賢令尹引疾理歸鞅膏腴
名久著酬應道彌廣不耐案牘勞田園思頤養黃鵠摩
青雲邈作天際想

青林互長板茅屋結其內背水澄秋光面山有餘態田

寓蜀草

卷一 五言古

四

疇何修整老翁行負耒竹籬互掩映寂不聞犬吠諒非
高隱流幽境自可愛安得二頃田於此樂恬退

井研道中

赴榮
縣任

从雨泥路滑入夜未遑休輿夫筋力盡顛仆不自由當
前山粗惡雲黑雨方稠人生苦行役擾擾爲身謀形勞
心復瘁問爾果何求一邑方待理情勢未易周到官百
務集更爲曠位憂羨彼田舍翁圍爐坐牀頭苦被冠纓
誤公私爾可羞

懷吳嘯雲

細雨迷前途黃花逗春色慨然歎行役忽焉動遐思饑

驅來巴蜀適情百無一茫茫走塵海世路苦偏側江山
徒壯麗孤芳邈難得造次覩瑤篇珊瑚爲架筆氣味比
幽蘭悵懷心如結錦城幸握手傷別復太息臨歧何倉
卒中藏難具悉未免俗眼白不堪余有七井甘固先竭
李苦復誰食古人不可作娛情寄翰墨所愧學植荒踟
躕文章伯瓦缶不堪擊矧冀崇令德羨君才英妙威鳳
翩然集屈宋作衙官騷壇亦供職安得共一方同舟擁
蘭梅浮沈難預定相期各努力

偶作

凌晨鳥語喧散步恣遊賞空亭待好風披襟挹朝爽荷

葉方田田游魚時三兩觸目浮蒼翠忽作濠濮想

輕雷走雲表朝霞明樹隙瀟瀟雨忽集平池跳珠白芭
蕉舒新翠繁響聲絡繹水氣逼衣衫青苔滿履迹幽賞
誰與同坐有談詩客

遲士我東皆
以詩見示

臥小亭上竹樹陰鬱荷花盛放而熱不可解作小

詩自遣

長夏苦蒸鬱昏昏惟思睡池亭置莞簟涼颼招不至沿
岸竹森森蕉葉濃陰庇水際時潑刺臥聽遊魚戲几上
堆棋枰訟稀幸無事蓮花競娉婷含笑相嫵媚忽憶閩
越中蠹吏肆無忌軍書雖報捷日夜勞兵吏吾儕恣偃

仰未曾効指臂共享昇平福內省伊誰賜

宿石牛鋪

我行將百里僕夫猶問路暮色蒼然至茫茫起烟霧霖
雨已連旬泥塗窘行步秋蟲猶唧唧對客如有訴林際
一燈明知有人家住在衙困簿書出門亦多故自愧非
吏才奔走徒慙碌還顧荷耒人里井從所務胡爲萬里
遊回首故園樹

傷周峩東

人事有反覆觀理苦難豁憶昔從嚴君垂髫體方弱航
松崖公禮厚意不薄

君祖令直隸文安延先君教讀余隨侍

讀書許隨

侍同儕恣歡謔是時君方孩提抱懷未脫轉瞬滄桑變
萬里隔寥廓公車經舊縣愴然望城郭逝者不可回往
事緬如昨一官幸在蜀得君樂復樂從我來三榮朝夕
慰饑渴教讀得餘暇小詩時閒作胡爲宿病纏呻吟愁
難割丈夫志未伸身先填溝壑無妻但有子生理將焉
托令人悲廉吏子孫成濩落更悲君正直早爲天所奪
遺詩未全收聲名嘅寂寞

王遲士抄君詩未得其全

內人生日

在十一月二十五日從余艱難備嘗今老病矣補詩壽之

薦蘿附松柏勢異風中柳我少居貧賤喜得汝爲耦是
歲維庚申君年甫十九家無婢僕使與嫂任杵臼我始

入庠序訓讀聊餽口人生各有營安能長相守節序欣
歸來幾得開笑口紡績供衣裳朝夕理鹽韭兒女方在
抱提攜掣襟肘邱嫂中道殂汝獨事吾母我幸歌鹿鳴
母衰血復嘔與父俱棄養拮据相左右調和兄弟間諸
事得無咎回首四十年艱苦何不有捧檄行萬里川中
歡聚首所惜彫盛顏照鏡悲老醜食貧筋力盡疾病更
纏糾將欲美君食中瀝腹不受將欲盛君服體羸病已
久壯時歷苦辛於今能樂否略喜通文字稗官常在手
鐙火聚婦稚忠孝爲分割聊得延氣息蒼天恩已厚隴
彼姬侍輩衣食任求取汝德能逮下令我顏益忸茲值

懸悅長共治一杯酒莫憶昔時貧浮雲遇亦偶莫云今
已豐家尙無半畝勸勉顧子孫矢心庶不苟我歌君試
聽與君偕眉壽

途中

旭日透熹微天寒陰復晴攜鋤誰家子田閒方有營豈
不憚力作各自謀其生人生本大難苦與世網撓居者
勦勤劬作客復宵征衣食苟粗足長嘯傲公卿

劃然川原斷幽清絕塵滓林麓遞高下澹蕩空雲水修
簞閒菜畦結茅誰擇里惟知安耕鑿不復問亂理服食
求神仙未必能輕舉樂歲共欣欣於焉足沒齒

曉行

新晴愛日光萬類展顏色烟巒互出沒細雲縈斷碧遠
水混天青近潭映石黑疎竹閒黃花鳴鳥破幽寂山行
多迴轉石徑復逼窄客子無機心曲折各有得深谷忽
窈窕危崖突挺特清境無夷險刻露非雕飾游目方騁
懷過眼倏無迹伊予耽林泉登眺感今昔茲遊雖非壯
聊足舒胸臆人生各有營我自適其適

偶作

大化無停軌萬物迭消磨人生無百歲百歲將如何一
世方逐欲汲汲投火蛾少時童稚輩今日髡已皤同此

夢夢中何時醒南柯

沐猴裂衣服蒼蠅逐腥羶所性固不易莫由明其然嗟
彼沈冥子軒冕若浮烟高車駟馬客通衢方喧闐日暮
未遑息神瘁百務牽

古聖不可作大道墮微茫詩書存後世藉寇資盜糧勛
襲先哲言飽飭爲文章治國不適用持身決大防在天
如有靈顧彼增感愴

儼巧世共尙親人在言色覲面隔肺腑窺測安可得茫
茫人海中誰能辨白黑有生本如寄世網苦逼仄仰視
南飛鴻羨爾有雙翮

過山溪

昔聞三峽橋聲如車百兩我行兩山閒雨積溪水漲突
兀亂石伏如馬亦如象水猛氣力雄石慙怒相抗挺立
似當關相倚如扼吭倒流急洄漩屢屈勢愈王龍鼉共
猖獗怒吼洪音亮西北有懸流旬旬急奔放似引援兵
至洶湧先聲壯會合勢更兇危哉誰保障浮槎與細石
宛轉隨濁浪聽之耳欲聾觀者色阻喪似矜得意鳴餘
波激高浪我行但須臾詭譎難摹狀隔嶺猶聞音身已
到嶺上仰視天宇寬耳目爲清曠

西園雜咏

命隸勿除草除草芽復作命隸勿掃葉掃去葉還落吾
心喜虛靜豈不憎穢惡觸目多如此安得盡清廓且復
修嘉植生意自可樂

琅池栽修竹荷錢散點點耳目欲澄清苦被蒼翳掩落
葉與浮萍撥去鏡面展倒影涵天光翠篠清風颭與客
攜棋枰永日恣游衍

芭蕉森如林清陰宜盛夏葉高出檐際翠鋪密無罅微
覺涼颼扇不畏紅日射翦燭話紙窗微雨蕭蕭夜侵曉
抽新碧更將紅欄亞

補屋

官署如傳舍去來人久閱梁木多朽橐檐瓦半剝缺內
雖盛塗飾牆壁或外裂飛雨漏痕交冬風畏凜冽飭陋
非余恥營建力恐竭出入懼覆壓聊將舊宇撤命工集
眾材萬事戒泄泄囊橐雖未充志斷奮勇決古人栖旅
次一夕必整潔伊余官斯地斯役敢中輟踵事或增華
請再俟俊傑

有感

郭璞慕神仙臨危詞奮決真卿慕神仙見戕李希烈神
仙非長生一死永不滅形骸隨草木心肝炳日月有術
可延年何人豎高節

讀書獵詞句空腹究何有橫議等橫流禍世滋已久暴
秦焚羣籍所坑蓋稂莠後來文章士瑣瑣竊升斗志未
親聖賢寸心不自忸

世人較鎗銖骨肉紛戈矛高視羲皇代作息何自由宇
宙本寬廣有生等浮漚膏火自煎熬逐利與禍謀鼯鼠
飲一勺此外更何求

亭亭修竹林悠悠長江水風物如不改歲月無還理蜉
蝣旦暮閒歌哭迭盈耳造物無盡藏風月皆可喜緬懷
古達人長嘯蒼烟起

雜詩

闡後
到任

憶昔值新秋臨歧敝別宴迢迢明月光流影被江漢行
邁焉辭瘁幽境未暇玩荷花半零落西風捐團扇簿書
匪朝夕時序驚倏換抗顏逐塵蹤誰與弄柔翰

棘闈聚朋儕昕夕笑語歡廣庭列華燭披卷夜未安科
名自昔重衡鑑良獨難丹桂燦金粟中宵清露寒悵觸
憶平生鍛羽淚未乾安得培植幹扶植青雲端

開軒面西園黃葉紛離披欣茲息征旅孟冬寒日馳撫
民苦乏術事上敢云疲且復理琴樽綠塘生漣漪念我
平昔友握手邈何期人生貴適意升沈安可知

夙無經世資塵事苦逼迫一官如匏繫百慮方寸積幸

得校文藝

歲暮
隱試

其彥共晨夕芭蕉委殘綠爐烟泛瑤席

時復披竹素遠絕軒窗客迂疎甘守雌素願庶云畢

陽輝黯無光氛霧塞穹昊側聞百里外探丸驚父老歲
稔倉儲積恩私荷大造火烈緬前軌斷根鋤蔓草匡世
須宏材中夜鬱懷抱莫卑彈丸邑寇跡未易掃

人生千載名不如一杯酒身衰齒復痛對酒不開口意
氣薄層霄迴首復何有灼灼池邊花裊裊亭前柳盛時
愛綽約零落等老醜寄言豪華子何物可長久

三桀叢爾地途賴不當衝吏拙幸俗淳山川鬱青蔥我
爲五斗米折腰愧貌躬東海乏薄田三徑長蒿蓬屈指

近十載寄跡風塵中伯仲隔雲烟回首望飛鴻

旅店書事

急聲忽聒耳驚夢夜縛豬細縛不得逞冤憤徒哀呼刀
杖忽交下怖死爭須臾共荷覆載恩貪生理無殊遭亂
遇干戈何異豬就屠幸值昇平代俯仰得自如胡爲肆
慘忍獲利僅錙銖釋氏殺戒重君子遠庖廚倚枕不能
寐寸心从踟躕縣中繫罪囚桎梏在其軀除惡貴猛烈
閔恤冀改圖念汝有家室釋汝當歲除

紀事

時勢度全局終始惟周詳無難決癰潰調補須良方海

外西戎敘貢贐駕舟航逐利乃天性厥志在通商愚民
樂耽毒癖嗜迷若狂金錢歲千萬如土填巨洋中國日
以匱銀價日以昂慷慨誰拜疏厲禁飭海疆意在塞漏
卮非欲扼其吭胡爲結仇怨攻圍重臣戕天威赫然
怒命將出廟廊徵師連秦楚蜀甲厲戎行大將建
旗鼓坐鎮在五羊白虹貫營壘壞雲壓城牆兇夷肆焚
掠黔黎罹災殃紅裙泣婦女金玉飽橐囊居民憤裂背
誓與夷俱亡一呼數百千鋤耨勝刀槍繞匝無逃脫夷
情甚倉黃此時出勁兵夾攻我武揚樓船爲我據砲械
爲我藏崩角稽首伏永永毋披猖傳呼來太守語急貌

皇皇州民莫齒莽慎勿將夷傷息戈兩和好多殺禍未
央勸民民莫應滅仇志方剛府尹語益切涕淚沾衣裳
爾弗聽吾言吾今伏劒鉅民恐得罪官觀望遂傍徨此
時大將軍聞變方搶攘有人前進言夷鋒未易當息兵
且勿戰和戎策最良一介達夷陣民散各歸鄉夷船揚
帆去烽火達錢塘復命大將軍出師如龍驤期爲主分
憂功名列旗常傍海城失守哀哀哭國殤封疆喪督臣
援兵空雲翔夷船復他適順流布帆颺姑蘇驚風鶴金
陵若沸湯守臣飛章告和戎策最良夷性貪逐利志僅
在通商溪壑願不違兵連禍未央我 皇本仁聖愛民

視如傷况茲多蹂躪甲士爲裹瘡耳苟就撫佳兵爲
不祥沿海得蘇息士卒解戎裝天兵素無敵萬里懾
氏羌孰謂太平久因循弛海防啓釁原微細貽憂及廟
堂九重心震怒懾帥付刑章譴謫兩將軍猶念屬天
潢詔褒殉難臣哀卹忠節彰嚴旨勤訓練講武振
紀綱敢告熊羆士玩愒勿蹈常天命方眷德九五正當
陽金湯慶永固福祚綿綿長

道中

出北郭不數里入大壑
流泉可喜詩以紀之

晨興戒徒侶逶迤出北郭清露沾客衣宿霧羃山腳緣
溪登坡坨極目盼寥闊千林色蔥蒨數里氣磅礴漸入

山澗深陡立鐵壁削崖抱天疑逼岸迴地更拓怪石呈
象猛危橋支板薄探勝眸先矚臨坎步屢卻篆古苔紋
封蛇盤松根絡有隙縛茅椽無人架飛閣穿竹忽陰森
透日復昭灼綺霞綢遙岑瓊泉韻幽壑就坦情方夷涉
險境非惡登頓非勿勞嘯咏時閒作世網夙所憚塵襟
茲焉豁安得同謝客醇醪共斟酌

山行

兩山蒼翠合溟濛逗微雨飛泉歷亂鳴入坎坎復吐石
怪慣橫路溪漲復齧土深谷愈幽杳雜樹爭掀舞忽聞
雞犬鳴雲開日已午巖隈築茅屋浮樸想太古泥滑經

遍仄蠟忘登涉苦

哭四弟薇堂

有序

四弟歿于乙巳臘底今夏得大兄書尙未知耗
展紙悲不自禁順筆絮絮以詩代哭不知是淚
是墨更何從計工拙也

輾轉久含悲含悲不能吐念我同根生形容無復覩欲
歌以代哭拈毫淚如雨去冬阿弟歿悲痛徹肺腑萬里
寄家書泣訴我同父今朝得兄信丙午閏五月得顯亭
兄二月二十日書猶
未知薇
堂消息兄信言縷縷云聞弟病愈眉開喜欲舞復囑酒
宜戒速歸骨肉聚那知作書日孤魂已歸土兄若得我

書悲痛心應腐縱知弟病亡未知弟病苦數日便瀾閉
腹虛脹如鼓每聞一長號我腸中刀斧療疾愧無術沈
痼實難愈去冬蜀酷寒凍縮鮮溫煦閉門試多士弟寒
誰爲主吐血甫起牀體弱宜滋補力不勝羊裘風威迭
肆侮百方病稍差失計突出戶厥志在速歸扶病試步
武欲速反淪歿那得船搖櫓薇堂欲從水路歸以難託無知幼
者尙哺乳汝送我孥來蜀道履艱苦繼偕汝孥來榮署
共庭宇汝與吾相依吾恃汝爲輔胡爲天不憐客遊
踽踽吾家無田園門戶誰支柱吾兄過七旬衰老嗚呼
瞽吾年已就衰日與胥吏伍兄信囑諄諄促汝返

汝歸當焚黃墓前碑急樹汝已赴溟漠魂魄傍父祖
汝平生歡萬端難悉數何以慰汝心爲汝置田圃何以
教汝子擇師勤訓誥汝硯吾勒銘後嗣珍瑤瑀汝著論
戒酒微堂自知酒爲害著論甚詳故紙藏篋篋昔年五弟摧尸與吾
未撫吾館長山五弟病歿乃歸哭今覩汝奄化寄棺古祠廡南門外主廟
談笑如目前頓爾成今古沈痛復何言空言亦何取悲
風慘慘來起視日過午

招集諸同人集西園卽贈鳳喈旋省

夜來雨聲繁傾聽倏及旦雲霽日微映園林景色燦好
友迤邐至杯茗羅几案荷錢貼鏡平芭蕉舒翠幔苔嫌

石徑滑鳥喜林際喚徐登知稼亭野曠憑檻看雉堞如
連環岡阜青不斷跨牛牧兒閒新秧插方半座客擅雋
才相與弄柔翰得句互傳觀五色詭錦段佳會良獨難
萍歎遇風散眼看春已暮堂堂節序換有酒還共斟勿
令俗緣絆西園稱雅集清談舌花粲猶憐哦松客詰朝
袂將判欽樂永此宵相看明星爛

捕賊謠

余爲令常懼盜至日夜以泄泄爲戒作此自諷
以當箴誦

貧民苦飢寒富室吝錙銖錙銖累成富財足意氣粗富

弱漫自豪積財乃福軀側聞少年場結交繁有徒自
都市中飲酒共歌呼鄰保不敢問客過羣擲揄躍馬佩
弓刀火器爲前驅富翁惶懼跪供獻惟所需富翁甚惜
財亦甚愛頭顱苟緩須臾死敢復吝金珠搜羅意未厭
命侶縛其孥汝欲骨肉完汝財盍早輸拮据納賊巢逾
期恐遭屠賊黨相顧笑汝善爲我儲匍匐告縣官縣官
正歡娛徵歌酌美酒六博戲座隅怒民過張皇詰責將
髭鬚迨下捕賊令賊飽散前途揚揚大盜魁手握捕盜
符

後捕賊謠

盜賊久爲患備盜亦多方保甲恐擾民集團眾斯強蜀地多險阻水涯兼山岡居既似星散聚難聯雁行往往百里半乃覩大鎮場步伐非素習見賊棄刀槍隸徒勢旣孤旅拒數被戕備盜旣乏術爲盜又多方白晝雜齊民夜出紛披猖聚散旣無時來去亦何常備盜雖無術掩飾或多方賊多乃報少委曲難具詳所獲爲羣鼠雄狐潛遁藏大吏赫然怒申諭飭紀綱獲盜懸厚賞爲盜列刑章吁嗟兇悍徒略不畏死亡市曹尸接踵他處又鴟張下吏奉約束申戒語煌煌政不尙姑息殺賊乃慈祥兵役爲窟穴勾結分橐囊將欲窮支蔓根株務翦備

爲盜雖有術捕盜亦有方賊散命易制賊聚迹易彰散
慮人辨識聚懼乏餽糧我貴識彼短賊亦畏吾長追逐
不稍息慎勿分界疆賊心旣怵惕我氣乃奮揚稂莠盡
翦除閭里安善良熙熙樂太平民富壽而康

遇雨

炎天烈日飛陰雲忽四布雨聲颯然集行人心惶怖始
疎終復密蒼茫失烟樹青山迷前途瞻望如濃霧泥徑
仄且滑輿夫頗窘步裳衣雖沾濡清風喜徐度苦熱非
一朝盼雨愜夙慕頃刻驅炎暑天心良可悟田疇枯槁
潤餘惠及行路須臾杲日出行程幸不誤披襟快涼爽

洒濯得新句

題聽雨樓

懸厓支小樓樓額題聽雨開窗俯荒園池闊盈二畝四
圍多修竹芭蕉兼雜樹秋深荷半枯隨風葉亂舞良宵
微雨集空齋客閉戶丁丁撥銀箏點點催羯鼓彷彿瀟
湘遊蓬濕漏未補斷續聲難摹高下誰爲譜遣人旅懷
淒哀鴻失匹伍欹枕數更籌鐙昏焰細吐狂飈突憑凌
馬陵飛萬弩似乘萬斛舟掀翻波濤怒須臾寂無聲金
鑪消香炷雲隙露一星池閒蛙兩部晨聞卷重茅浩歎
似杜甫窮巷憫蕭條移牀少乾土安得千萬閒人得安

環堵

凝翠樓八景

合園內
外諸景

索性喜看山山來城內卧蜿蜒如玦環蒼翠園客座新
沐五髻鬟忽穿白雲破開軒
面山

前後做虛窗青天無片雲良夜默獨坐清光應爲君流
輝此間滿揚州只二分窗虛
貯月

城內闢荒原秧田如碁局向晨蓑笠集農人欣雨足白

鳥忽飛來點破千畦綠

秧田
新雨

孤塔凌蒼烟傑立出榛莽夕陽一抹紅忽作諸天想古

寺寂無人風來鈴鐸響

孤塔
夕照

荷塘玉鏡平紅妝倚翠袖憑檻日已夕微風葛衣透不

須碧筒盃露珠清可漱

荷靜
納涼

一徑入深竹蕭蕭疑風雨茗戰與方酣濃綠蔭入戶披

襟共當風不覺日過午

竹深
留客

石徑迤邐來穿花每俯首亂紅襯蒼苔著屐未敢走風

姨一夜狂花落二寸厚

石徑
落紅

紅欄曲屈間楊柳舒新翠爲愛好時光欹枕未肯睡黃

鸝自多情頻嚶將人媚

春柳
聽鶯

捉馬行

嘉慶間教匪於山東定陶河南滑縣等處滋事

官兵援剿絡繹資送徽索車馬未久事平閭里
晏如幸生太平目不睹兵革皆

皇上如天之福不可忘也追憶作歌使世世感荷
聖德知安居樂業有所自來

縣隸頻追呼四出繁有徒父老問何事手執硃批符河
南徵兵旅東昌集軍精絡繹送軍裝車馬爾應輸官心
如火灼鄉間敢支吾父老前致詞安坐緩須與大兒縛
雞割小兒酒遠沽醉飽更附耳囊中出青蚨縣隸嬉笑
去沿戶如追逋婦子方駭顧牽馬已疾驅大車勝小車
無馬捉牛驢黠隸更多術分黨扼要衛客裝置道左紅

顏泣路隅強奪我車馬何由達前途民未見軍士見敢
將虎鬚民欲見官長闌人笑桺榆輪流可供役竭澤事
可虞行者咸裹足居者歎村墟赫怒皇威揚狂寇盡
伏誅縣隸恨無事父老同歡娛但願樂太平不復怨吏
胥諄諄告子孫聖德大莫踰閭閻無可報踴躍輸田
租

出行

岡巒莽迥合百千列松樹人行蒼翠中細雨霏如霧四
山生白雲田水互奔注人家在翠微屋角參差露雞犬
不聞聲炊烟風徐度石壁立千尋橫絕疑無路怪狀鬼

斧剗突兀含餘怒崩峭厯曲折心懾屢窘步轉喜境恢
奇倉卒誤驚怖岡尾猶起伏勢欲隨我去

行近成都高處遠望

迤邐涉長坂日光射雲罅蒼茫隱雉堞樓閣疑飛架偉
哉名勝都長安此其亞江濤雷鼓鳴雲氣蒼龍駕奔走
苦風塵顧瞻得餘暇荒土埋英雄山川閱王伯萬古頻
興衰悲歡須臾化笑我滄海粟勞勞連日夜遙望酒旗
斜沽酒醉客舍

聞馬子琴病

故人渺天末望遠久悵結貧病交纏綿放歌幾愁絕昨

日寄書至厚意重膠漆勸我歸田園風塵勿埋沒詩書

傳外孫

余孫阿京

誠導語諄切書中不盡言慨然客緬述身

未卧榻上面瘦稜見骨頻頻囑後事似謂此永訣憶君
年方稚才豪氣疎濶生駒不受控平原恣馳突西弔白
雪樓雄襟劇笑兀東觀溟渤寬日月探窟穴朝夕鮮定
所千里冒風雪結識多老蒼中腸彌激烈詞辨紛縱橫
露肘被短褐里中富室兒望見氣先折奔走二十年身
世歎彌拙閤人歷艱辛妻孥忍飢渴海內寡提攜最影
安蓬華去年山東旱赤地龜甲裂側聞君投徒餽粥幸
無缺肆意恣探討搗謙秉高節友朋聯蘭臭瀟灑送日

月捧檄來蜀時舍卒闕面別迢遞綿關河平生意驂眉
胡爲困二豎無人祝哽噎伯道嗟無兒盧仝婢不韞長
鯨卧海澤泥塗不自拔編詩初刻就字字嘔心血前欲
贈長歌子琴乞余作長歌贈之未果白慚才筆劣終日對簿書甘受
俗塵湮惟計歸田時著述共商摧一病竟沈綿書空惟
咄咄磊砢松百尺蠹蠹脂膏竭寶劍千金值繡澁成凡
鐵蒼茫東海雲淒涼戕眉月自命雄騷壇墓旁留殘碣
庶幾千載名不與身俱滅

蜀地

連山若波濤傾向東南奔劍閣扼咽喉夔巫爲蜀門幾

眉蒼茫起岡巒識所尊大江從西來雷硤撼乾坤鴻蒙
誰開鑿元氣此鬱蟠金牛關雲路氣脉通中原暴秦喪
文物漢起似朝曦由宋及李唐魁桀接踵繁吁嗟割據
輩干戈肆弁吞山河紛破碎風俗失樸淳聖皇撫區
宇陶鑄荷殊恩巴蛇旣就屠檣杙無遊魂煮鹽惟陸海
鑄錢穴銅山朱提溢郡郭煎茶鬻諸蕃百貨通荆楚寶
布輸苗蠻巴渝盛歌舞錦城日管絃聖澤旣累世屹
然作雄藩禮羅四野張採擇盡蘭蓀縹緲來北關叱馭
走西川飛蓋交通衢廣庭列朱軒驂騑矜騰踴鵬鸞看
飛翥物蓄稱繁盛芽孽潛其間盜兵弄演池衲衣戴南

冠萑浦或嘯聚爭探赤白丸地雜五方俗浮囂性獨偏
睚眦逞兇鋒僵尸駭閭閻諸葛昔治蜀垂愛戒政寬西
南邈天末唇齒連滇黔外達雪山路控馭及窮邊艱鉅
慎寄托朝廷委任專下吏責雖輕百里須才賢俯仰每
自愧朝夕懼素餐良懦待撫綏根莠務盡芟精衛志填
海杞人或憂天一隅窺大局籌畫規其全未雨急綢繆
徙薪火未然經理咸得宜海內慶晏然金甌完不缺華
固億萬年

駝牛歎

有叟赴城市蹢躅疲牛牽全家資餬口鬻炭聊爭先重

馱置牛背竹兜仍在肩狹路官長來呵叱聲連連牛老
筋力盡負重鞭不前隸卒怒排擠蹄蹶墜水田牛倒虞
折骨炭濕半棄捐呼助少將伯高高仰看天婦子飢欲
死倚門望眼穿回視官去遠飛蓋渺雲烟

早行

天陰久不雨寒氣釀成雪晨行石徑滑觸目歎清絕草
木莽披絮頭垂腰未折誰雕玉玲瓏萬態繞一簪昨夜
天公戲漫空冰花結紅日出東海奇景須臾滅日暮朔
風急細雨洒未歇欲投孤村宿犬吠出林樾